

22 DE MARTZU 2021

Is ogus de sa Soprintendèntzia si movint bia a sa obra de Maria Lai

Apustis de sa pedidura de su Comunu, in Ceràxius lompit sa Soprintendèntzia: sa obra de Maria Lai chi ddoi est in sa faciada de una domu privada est meressidora de amparu. Su subrallogu de is tres funtzionàrias de is ufiziud cumpetentis torrat a allui is luxis apitzu de sa obra de s'artista ulassesa: in mesu a is medas creatzionis lassadas in erèntzia a sa Sardìnnia, ddoi est puru sa prima obra ambientali cosa sua, fata in sa faciada de una villeta intre bia della Resistenza e bia Amsterdam: "La Casa cucita" ("Sa Domu cosia"), de su 1979.

Apustis de is medas sinnaladuras arricias, seus bènnius a sciri de sa presèntzia de custa obra. "Est boluntadi nosta circai de valorizai e amparai cussu chi aturat de sa obra, imoi arruinada meda. Si poneus asuta de sa autoritadi bosta po unu cunfrontu eventuali chi permitat de apariciari is stremus prus profetosus", si ligit in sa noda imbiada a sa Soprintendèntzia su 15 de friàrgiu, firmada de su sìndigu Gigi Concu e de s'assessora a sa Cultura Roberta Relli. Apustis de unu mesi de abetada, s'arresultau de su subrallogu: "Sa Soprintendèntzia de Casteddu at a èssiri prexada meda de apariciari s'amparu de custa obra, donendi is linias de caminu e acostiendi-si a su Comunu in su traballu beru po sa entrega prus longa a su tempus benidori de sa "Casa Cucita", sprigant is espertas. "Coidai de architettura e arti cuntemporànea mentras si faint stòria, est sa tarea de sa Soprintendèntzia e de is Entis Localis: unu traballu eciseri, de responsabilidadi culturali, de cuscienzia de sa comunitadi".

Su Comunu est pruntu: "Seus prexaus de sa sceda bona de s'Enti, chi at arreconnotu sa obra ospedada in su territòriu comunali cosa nosta, merescidora de amparu", narrant su primu tzitadinu e s'assessora. "Po parti de nosatrus ddoi est sa disponibilitadi prus manna po ponni menti a is inditaduras chi s'ant a donai po podi valorizai in sa manera mellus possìbili custa obra, aici de dda podi torrai a donai a sa tzitadinàntzia, donendi-ddi sa visibilitadi chi si meressit". Imoi su fueddu tocat torra a sa Soprintendèntzia, chi at a depi inditai su caminu de sighiri.

